

## Edizioni

- letto 622 volte

### Saba

I.

Bele Doette as fenestres se siet,  
lit en un livre, mais au cuer ne l'en tient,  
de son ami Doon li ressovient,  
qu'en autres terres est alez tornoïer.  
E or en ai dol.

II.

Uns escuiers as degrez de la sale  
est dessenduz, s'est destrossé sa male.  
Bele Doette les degrez en avale,  
ne cuide pas oir novele male.  
E or en ai dol.

III.

Bele Doette tantost li demanda:  
- ou est mes sires que ne vi tel pieça? -  
Cil ot tel duel que de pitié plora.  
Bele Doette maintenant se pasma.  
E [or en ai dol.]

IV.

Bele Doette s'est en estant drecie,  
voit l'escuier, vers lui s'est adrecie.  
En son cuer est dolante et correcie  
por son seignor dont ele ne voit mie.  
E [or en ai dol.]

V.

Bele Doette li prist a demander:  
- ou est mes sires cui je doi tant amer? -  
- En non deu, dame, ne.l vos quier mais celer:  
morz est mes sires, ocis fu au joster.  
E or [en ai dol.]

VI.

Bele Doette a pris son duel a faire.

- Tant mar i fustes, cuens Do, frans debonaire.  
Por vostre amor vestirai je la haire,  
ne sor mon cors n'avra pelice vaire.  
E or en ai dol:  
por vos devenrai nonne en l'eglyse saint Pol.

VII.

Por vos ferai une abbaïe tele,  
qant iert li jors que la feste iert nomeie;  
se nus i vient qui ait s'amor fauseie,  
ja del mostier ne savera l'entreie.  
E or en ai dol:  
por vos devenrai nonne a l'eglise saint Pol. -

VIII.

Bele [Doette] prist s'abaiie a faire,  
qui mout est grande et adès sera maire,  
toz cels et celes vodra dedanz atraire  
qui por amor sevent peine et mal traire.  
E or en ai dol:  
por vos devenrai nonne a l'eglise saint Pol.

- letto 367 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

Source URL: <https://letteraturaeuropaea.let.uniroma1.it/?q=laboratorio/edizioni-346>